

Un enfoke riba Aruba 2020

Carbon War Room ta entrega Prome Minister Mike Eman rapport 'Smart Growth Pathways'



ORANJESTAD(AAN):Presidente di Carbon War Room dr. José María Figueres a haci entrega di e raport 'Smart Growth Pathways' cu Carbon War Room a traha. Haciendo uzo di su experticio y cu e informacion cu e tin, CWR a traha e documento relaciona cu e reto grandi cu Aruba a pone su dilanti pa na 2020 ta independiente di petroleo fosil.

Tambe con pone un base solido pa prosperidad sostenibel y crecimiento den futuro. "Pa nos di Carbon War ta un placer y orguyo di por entrega e documento aki na Prome Minister Mike Eman y su gobierno", Figueres a worde compaña pa ehecutivonan halto di CWR, Peter Boyd, Hilary McMahon, Maya Doolub, Mark Grundy.

Figueres a accentua cu e rapport ta parti di un proceso cu ta andando. El a splica con na fin di 2011 CWR a cera conoci cu e vision di Prome Minister Eman. Un vision pa converti Aruba den un economia sostenibel haciendo lo menos posibel uzo di petroleo fosil.

"Nos a haya oportunidad pa cuminsa traha cu bo den e prome kwartaal di 2012" Figueres dirigiendo su mes na Premier Eman a bisa. Na Rio +20 e partnership a keda formalisa. CWR di su banda tambe a haci un compromiso. E asina yama 'ten islands commitment'.

E compromiso aki ta encera comparti cu otro islanan den Caribe loke CWR a siña y experencia den e caminda cu el a scoge pa cana hunto cu Aruba den logra su meta. Un otro punto cu Figueres a trece dilanti relaciona cu e rapport ta cu su obhetivo ta parce di ta total, di tin tur informacion necesario aden.

"Entregando bo e raport aki awe mainta nos ta spera cu tur hende na Aruba por les'e, pa asina bira activamente involvi den dje y contribui na su mehoracion y mira con nos ta hiba esaki na nivel di cada comunidad y cada hog-

ar". Figueres a bisa cu CWR ta conta riba e forma con Aruba ta anda cu su asuntonan: den forma habri, consultativo y semper tumando den consideracion pensamiento y idea di otro. Un otro punto cu Figueres a trece dilanti ta cu den e proceso andando aki CWR lo kier traha di cerca cu partners na Aruba mes y pafu di Aruba. "Na Aruba nos kier traha den forma estrecho cu WEB y ELMAR, organizacionnan fantastico y confiabel. Nos kier traha tambe cu otro organizacion y partnernan local. Sigur cu partnernan cu Aruba a invi-

ta pa establece nan mes aki manera TNO y partnernan cu CWR ta trece aden".

"E vision di Prome Minister Eman ta 'awanan desconoci', ningun otro pais a yega di bay den un direccion asina ainda cu e forsa, conviccion y pasion cu Aruba ta haciendo". Figueres na mas di un ocasion a subraya cu tur esaki ta danki na e liderazgo visionario di Prome Minister Eman. "Aruba ta e pais mas avansa den converti su mes den un economia di emision bou di petroleo".

Figueres, un orador talentoso cu ta haci hopi bes uzo di metaforonan pa describi loke e kier bisa a splica cu e

rapport ta concentra riba loke por worde yama 'low hanging fruits' ya cu den cierto sector na Aruba por logra den forma acelera reduccion di emision di petroleo. Tambe e rapport ta referi na cierto sector na unda CWR lo kier traha, pero cu e reduccion di emision di petroleo lo ta mucho menos den magnitud. E 'hanging fruits' ta den e sector di coriente, transporte y den eficiencia di edificio. "50% di boso uzo di coriente ta pa airco tur rond e isla y aki ta unda un tremendo trabao den eficiencia di energia por worde haci". Agricultura ta un otro sector na unda por logra hopi.